

PUISII SCHIRZUSI
E
CUNTRASTI

L'EURU E LA £IRA

Un €uru cadduliava strata strata
currennu chi parìa un dispiratu,
quann'è chi 'na cartuzza agghiummuniàta
firmau lu so caminu scatinatu.

Furiusu l'€uru e misu a tu pi tu
si 'mpaia 'dda cartuzza sculuruta:
“Ti permettisti e nun lu fari chiù!
Pi curpa tua pigghiavi 'sta caduta!

“Tu, forse, nun lu sai cu sugnù eu,
eu sugnu la munita chiù 'mpurtanti!
La £ira 'un cunta chiù, pirdìu lu 'mpeu
perciò, stai muta e levati 'i davanti!

Eu puru a mister Dollaru lu futtu,
cu mia abbassàu la cricchia e cadìu a piccu;
cu l'€uru l'omu accatta propiu tuttu,
lu puvireddu eu lu fici riccu!”

Allura 'dda cartuzza tutta rutta
-erano Milli £iri 'ncudduriàti-
ci dici a l'€uru: “Tu, malacunnutta,
cu tia cca semu tutti cunzumati!

Eu sugnu la £iruzza chi firriàva,
cu mia si stava boni, 'un c'era stenti
ed ogni puvireddu ci campava,
cu tia nun si ci accatta ormai chiù nenti!

Lu Dollaru lu futti e ci hai ragiuni
e fai putenti a cu' ti teni 'n manu
ma eu, chiù sperta, pezzu di babbuni,
futtia p'anzina 'u riccu americanu!"


Allura l'Èuru, sempri chiù 'nfuriatu,
dopu 'sta gran risposta di la £ira,
si 'ntisi offisu e troppu maltrattatu
ci dissi: "Ti cunzumu a tia stasira!

Si' ormai passata, si' un ricordu spogghiu,
qualcunu pi pietà chi ti cantia
ti teni dintra un quattru o un portafogghiu
ma poi però a cu' vonnu? Tutti a mia!"

Carissimu Èuru meu, tu ci hai ragiuni,
mi misiru appizzata 'nta un quatrettu
o dintra un portafogghiu, 'nta 'n agnuni;
mi tocca suppurtari 'stu dispettu.

Però, si tu vidissi, giovanottu,
qualcunu chi m'alliscia e mi talia,
li lacrimi ci affaccianu di bottu
e 'i corpu 'i sangu 'i manna tutti a tia!"

2007



LU PORCU E LU SCECCU

Lu porcu chi sfuttia lu scicareddu:
“Eu sbafu e a tia ti tocca travagghiari,
eu tegnu sempri chinu lu vureddu,
pi tia tanticchia ‘i pagghia di manciari.

E quannu a la matina, a l’agghiurnata
ti susi e vai a fari ‘u to duviri,
travagghi sempri, finu a la scurata
e si ni voi, nirvati a mai finiri.

Oh sceccu! Campi senza nuddu sgamu,
‘stu nomu fu ‘nzirtatu veramenti;
s’ ‘un pigghiu sbagghiu ti lu detti Adamu
vidennu ch’eri pocu ntelligenti.”

“È veru, chi travagghiu a gran fatica
e manciu pagghia e fenu picca e nenti;
p’amici lu carrettu cu la bica
e nun canusciu li divertimenti.

È veru, su’ vint’anni e riflittennu
travagghiu e sugnu sempri cu l’affannu;
ma nonostante tuttu a mia mi tennu:
tu ‘nveci ‘un si lu porcu d’oggiallannu!

2007

LU VIAGRA

La scienza ha fattu passi surprinmenti
ed ogni jornu 'na scoperta bona;
la cosa chi nvintau ultimamenti?
La pinnula pi cu' è chi 'un ci funziona.

A vidiri 'sta pinnulicchia azzurra
nun ci cridissi chiddu chi pò fari,
la fa licchetta si era in pocu zurra,
li vecchi arrè picciotti fa turnari.

Però ci sunnu contrundicazioni
di certu nun si n'havi approfittari
e s' 'un si pigghia cu muderazioni
lu cori scatta, ti lu fa firmari.

'Na vota, un vicchiareddu chi canusciu
si la scurdau 'n sacchetta e cu surprisa
a chi era zoppu e caminava musciu
ristau tri uri cu la jamma tisa.

2007

LA CUNNANNA DI L'OMU

Adamu, 'nta un jardinu scunfinatu,
passava jorna senza fari nenti,
lu Patri Eternu tuttu ci avia datu,
ed iddu 'nveci 'un era mai cuntenti.

Ci ripitia: "Signuri ch'âmu a fari?
Sugnu sulu, la testa mi smanía!
Picchí 'un mi fai a qualcunu pi parrari?
Qualcunu chi mi duna cumpagnia..."

E lu Signuri, stancu d'attintàllu,
l'allúppia e poi 'na còstula ci leva;
p' 'un séntilu parrari e accuntintallu
ci detti 'a cumpagnia: ci fici ad Eva.

Adamu, quannu vitti 'sta criatura,
chi di biddizzi n'havi veru tanti,
curriù, mischinu, e fici prestu e allura
pi méttisi la pàmpina davanti.

"Signuri, ti ringraziu veramenti!
'N äutru jornu e divintava un pazzu...
Ci l'hau cu cu' parrari, finalmenti!
Ma...ora a parti chissu, chi ni fazzu?

Ma Eva, p'attuppari 'u tempu smannu,
si leva 'ddi du' pàmpini suvecchiu;
talmenti fici e sfici, finu a quannu
Adamu ci àppi a rùmpiri 'u cuvecchiu.

‘Sta dibulizza fisica di tannu
rappresenta la nostra tentazioni;
ci l’èppi Adamu e nni lassau ‘stu dannu,
d’aviri d’ ‘u Signuri ‘a punizioni.

Di Adamu sugnu figghiu e discinnenti,
mi lu nznigavi e ora vi lu dicu
chi si vuliti ch’ ‘un succedi nenti
lassati stari ‘i pampini di ficu...

2007

LU RICCU E LU SCARSU

Lu riccu chi curria a testa aisata,
pinzava sulamenti a li so' affari,
lu scarsu, chi campava a la jurnata,
pinzava ch' 'un avia di chi manciari.

Facianu tutti dui la stessa strata,
ma nenti e nuddu potti 'mmaginari
chi lu distinu fici 'sta bravata:
pinzau di falli vidiri e 'ncuntrari.

Si 'ncòntranu, si scòntranu e cadéru
senza capìri soccu succidiu;
lu scarsu, dispiacutu pi diveru,
dumanna scusa e dopu lu susiu.

Lu riccu ci rispunni: "Scilliratu!
'Nta la me strata cu' ti ci purtau?!
Pi curpa di 'stu pezzu di ngrasciatu
lu vistiteddu novu si sfardau!"

"Signuri meu, picchè faciti nervi?
Ristati calmu, bonu, 'un v'agitati!
La giacca si strazzau? A soccu servi
si dintra ci su' l'äutri appizzati?"

Allura eu ma soccu avissi a fari
chi persi lu panuzzu p' 'a famigghia?
A la me casa soccu ci hâ purtari?!
Pi nenti vui faciti un parapigghia?"

“Tu nun si degnu mancu di parrari!
A mia nun mi ‘nteressa soccu ‘mbrogghi!
Ma lu Signuri chi ti fa campari!
Picchi ti teni vivu e ‘un t’arricogghi?!”

“Ti senti ‘n gradu tu di giudicari
picchi pusseri e teni sordi assai?
Picchi tu manci soccu voi manciari...
Ma a quannu mori, ci hai pinzatu mai?”

Li to’ ricchizzi tutti l’hâ lassari!
Nun ti li poi purtari tutti appressu!
Lu paradisu ‘un ti lu poi accattari,
si’ scarsu o riccu, pi iddu fa lu stessu.

Davanti a lu Signuri onniputenti
nun cunta la ricchezza materiali;
è riccu puru cu’ nun havi nenti,
si lu so cori è privu di lu mali.

Cuntinua la to vita cu ‘st’addiccu,
pinzannu chi li sordi su’ ‘mpurtanti;
di tutti dui videmu cu’ è chiù riccu
quann’è chi nni trovamu ddá davanti...”

2007

SBAGGHIU DIVINU

Mi ‘mmàginu mischinu lu Signuri
chi mentri nni talia d’ ‘u paradisu
ci appizza jorna sani, misi e uri
taliànnu lu so munnu com’ è misu.

“Eu t’avìa fattu veru troppu beddu,
pi fàriti perfettu m’impegnavi
ma ora si arridduttu a lu sfraceddu
e nun capisciu ‘unn’è chi mi sbagghiavi?!”

“Di Lunniri a matinu mi susìvi
cunvintu di com’è chi t’avìa a fari,
lu Sabatu a la sira ti finivi,
Duminica mi potti ripusari.”

“Facennumi lu cuntutu nun mi torna:
dunn’è chi fu lu sbagghiu esageratu?
Sicunnu mia fu chiddu cu li corna
e l’omu lu so complici e alleatu...”

2007

LI RICAMBI UMANI

Addivintamu màchini viventi
e comu ad iddi avemu li ricambi;
meccànichi duttura, comu nenti
chi ‘n capu a niatri fannu cosi strambi.

Cusà ti servi un vrazzu ti lu metti
oppuru si hai lu cori a trapiantari
si voi lu nasu e vucca chiú perfetti
ci vonnu sordi e tuttu si pò fari.

‘N amicu meu suffrìa d’appenticiti
e si ricoverau ‘nta lu spitali;
macari viatri a chistu ‘un ci criditi
ma ‘st’interventu fu caputu mali.

S’addummisciu tranquillu ‘nta lu lettu
pi quantu ci livàvanu ‘ddu pezzu;
sapiddu si fu sbagghiu o fu dispettu:
s’arruspigghiau mancanti di ‘dd’attrezzu!

2007

LA ME VINNIGNA

Vinnigna ni canusciu piccaredda,
a parti qualchi jornu pi babbiari;
cu runcuneddu, forficia e cartedda
partia pi lu filaru, a vinnignari.

“O Peppi, ddá lassasti la racina
metti la testa a postu a travagghiari!”
“A mia già mi fa mali la carina”
pigghiava ‘sta calùnia pi lintari.

Me nonnu mi dicia: “Talia ch’è beddu!
‘Na vota comu tia ci avìa lu mulu...
Quann’era a la to età, chiù nicareddu,
lu me filaru m’ ‘u purtava sulu.

Nun c’eranu trattura tutti attornu
e mancu ‘sti carteddi fini fini
e prima chi finìa lu ‘nteru jornu
ristava senza vrazza e senza rini.

Picciotti di ‘sti tempi, chi capiti?!
‘Na vota ch’ ‘un vi manca propiu nenti...
Travagghiu nfutu mancu ni vuliti
e siti tutti mùrmuri e lamenti.”

Amentri, tra li vuci e li cazziàti,
avìa arrivatu l’ura d’ ‘a manciata
e tutti ‘n tunnu a longhi tavulati:
stufatu, sardi, ficu e capunata.

“A tia nun ti tucassi di manciari:
chì stiornu mancu l’acqua t’hai scuttatu!
Si vinnignamu è pi putiri fari
lu viniceddu bonu e raffinatu...”

“Allura nonnu, tu nun voi capiri?!
Chi fazzu, ti lu spiegù, ti lu scrivu?
Ma lu capisci? Comu ti l’hâ diri
chi sugnu nicu e vinu nun ni vivu?!”

2008

VICIVERSA

Eu m'addumannu: “ ‘Unn’è chi semu junti?”

- ‘Sta me Nazioni, di ddà ‘n capu a vàsciu -
si nni facemu anticchia quattru cunti
l’Italia, è junta ormai tutta a lu sfasciu.

Parrini chi si vonnu maritari,
mafiusi chi lu statu li pruteggi,
li genti preparati su’ a zappari
e li ‘gnuranti ‘nveci fannu “leggi.”

Päisi meu, tu vivi ‘sta cunnanna
e tutti vonnu fari li liuna:
li comichi chi fannu prupaganna,
politici chi fannu li buffuna.

2007

LA LIGGI E L'ARTICOLI

L'articuli, sciarriànnusi,
facennu un quarantottu,
vuciavanu abbanniànnusi
pi cu' era chiù picciottu.

“Fu eu chi vinni a l'ùltimu,
perciò sugnu perfettu
e viatri ormai dicrèpiti...
Sugnu eu lu pridiletu!”

“Chi dici, cosa inutili,
soccu è chi voi 'mbrugghiari?!
Tu dici cosi “fùtili”:
sì' cosa d'abrugari!”

Eu 'nveci cu li léttiri,
palori ricercati,
spirugghiu tanti ghiommari
di chiddi 'ncudduriati.”

La Liggi chi sinténnuli
parrari inutilmenti:
“Silenziu, petri pennuli,
chi su' 'sti sparramenti?!”

Vi dicu e ricurdàtilu:
sugnu eu la vostra matri,
sugnu eu chi dettu e régulu,
cumannu a tutti viatri.

Ognunu di vuiäutri
ci l'havi lu difettu
chi siti figghi e a fàrivi
fu l'omu e 'un è perfettu...

2008

LU CRUCIFISSU MAGICU

'Nta 'na chiesuzza nica d'un paisi,
spirdutu 'n capu un pizzu di muntagna,
fattu di genti senza tanti 'mprisi,
viddani chi travagghianu 'n campagna.

Ci fu mannatu 'n parrineddu tostu,
- un picciutteddu chinu di fururi -
picchè tutta la genti di 'ssu postu
s'avìa scurdatu 'n chinu a lu Signuri.

Pi la curiusità di 'stu parrinu,
pi sèntiri la missa, la palora,
la chiesa di Duminica matinu
china cucuccia tutta 'nzina a fora.

'Na mistica curiusa chiù di tanti,
- chi 'nta li chiesi s'hannu sempri vistu -
di chiddi chi a taliàlli sunnu santi
e di darrè ti sparranu anchi a Cristu.

"Parrinu, havi a scusari sta dumanna,
m'havi a livari 'na curiusità
è Diu 'n pirsuna forsi chi lu manna?
Nun s'ha mai vistu 'sta gran fidi cca!

Parrinu, rispunniti senza scantu
e dàtimi risposta 'nta 'na botta!
Aviti qualchi donu? Siti santu?
Nun c'era nuddu e ora vennu a flotta?!

"Si ti lu dicu tu nun mi tradisci?"
"Putissi sprufunnari 'nta l'abissu!
Vi giuru, arrestu muta comu un pisci!"
"Qual è lu me sigretu? Un crucifissu!"

Un cricifissu chi havi li “poteri”,
a tutti li cristiani fa prijari.”
“Mi vogghiu addinucchiari a li so’ peri:
parrinu, ma chi fa, m’ ‘u fa taliàri?”

Ma era propiu chissu chi vulìa,
la ciappula parata avìa scattatu;
si la purtau ddà dintra ‘n sacristia
e cummitteru ‘nzemmula piccatu.

Ma ‘dda prumissa vinni scunsacrata
- ma quali fidi e fidi di l’Egittu! -
Li fimmini di tutta la cuntrata
facianu ‘n fila ‘ndiana ‘ddu tragittu.

Lu sacristanu, chi nun era santu,
avia caputu ‘sti ‘mpirugghi lordi,
ci dissi a lu parrinu: “Mi la cantu!
Si voi ch’ ‘un parru tu m’hâ dari sordi!”

“T’hâ dari sordi?E dunni ci sta scrittu?!”
Ti dugnu ‘na panzata di lignati!
Fatti li fatti toi, t’hâ stari zittu!
Ti spaccu ‘ssa tistazza a vastunati!”

Lu sacristanu nun si la calàu,
a lu parrinu ci paràu la riti
e pi suvicchiaria si la cantau
cuntannuccillu a tutti li mariti.

Mischini, ‘dda manata di curnuti,
circaru di ‘ncagghiari ‘dda carogna,
purtroppu ci tucava stari muti
si ‘u fattu si sapìa, chi granni vriogna!

Allura strummintiaru propiu chissu:
lu pettu fintu, truccu, dipilati
e ddà davanti di lu crucifissu
a ‘ddu parrinu quantu furcunati!

Ma vi la ‘mmaginati la scinata?
Lu farmacista, ‘u sinnacu, ‘u becchinu,
la giunta tutta quanta radunata
pi cafuddari tutti a ‘ddu parrinu.

Ma lu ‘ndumani, dopu l’accadutu,
lu viscuvu pruvvidi a manu a manu:
‘ddu parrinazzu vinni trasfirutu
‘nta ‘na caserma a fari ‘u cappillanu.

‘Na fimmina, di chiddi praticanti,
pinzannu a ddu passatu chianci spissu;
nun su’ di pintimentu li so’ chianti:
ci manca ‘ddu gran beddu crucifissu!

Havi ragioni ‘ddu pruverbiu anticu,
- chi fattu fu pi monachi e parrini -
“attentati la missa e poi ti dicu
pigghia un marruggiu e stoccaci li rini!”

2009